

老圃良言

巢鳴盛述

中華書局

老圃良言

此據學海類編本
排印初編各叢書
僅有此本

老圃良言

明 嘉興巢鳴盛止菴述

生世業緣。芟除殆盡。村居荒僻。祇鄰並一二老圃。相與往還。嘗爲余言種植之事。大要有十。依法試之。罔有不效。嘉蔬美果。實叨其惠。因述爲老圃良言。以告世之從事灌園者。

一曰下種

核宜排子宜撒。其法收投頭乾實。懸通風處。臨種少曬。擇向陽所。以肥土鋪半。將核尖向上排定。再以肥土蓋之。欲種蓮實。亦如此法。子則不然。須以灰泥各半。將子雜拌於中。按法撒之。乾濕得所爲妙。

二曰分插

先築肥地。以水滲定。擇根傍小枝連處截斷。次年移之。或用末鉤。將條釘地。以肥土壅之。或將貓竹一節劈開。納泥於中。合縛枝上。或剪尺許。以溼紙包裹。及插芋蔔內。埋土中。置陰處。勿令乾。卽活。

三曰接換

接換必須相稱。貼大宜高截。貼小宜低截。對接上下各正去半片。偶接上下各斜去半片。插接截平本根。削斜分枝插皮內。合接同種兩枝。各削去半邊。俱用麻縛箴幫。泥封縛裹。四圍扞棘。以防鳥雀。常將水洒。更避日色。若遇狂風大雨。急宜遮護。否則不活。

四曰移植

先記枝之所向。將竹刀掘起。下勿傷根。上勿損葉。如前種之。再加肥土。填滿四邊。又以小竹扞定。麻皮縛牢。以防風搖。又以石子鋪面。以防泥濺。如泥一濺。葉即黃脫。仍須澆灌得宜。謹避風日。數日即活。或云。移栽果木。宜在望前。則子繁多。

五曰修補

須得意趣。去瀝水枝向下者。刺身枝向內者。駢紐枝連結者。冗雜枝多亂者。風枝細長者。傍枝新發者。仍將大枝截去。以蜜塗之。蟲窠其上。自饒古意。復以馬糞和泥。罨其潤處。或用魚腥水澆之。便生苔蘚。尤助野趣。如欲曲折。略割其皮。隨意轉摺。以檣縛之。

六曰保護

務令適時。倘風日相侵。寒熱暴至。當以布帳遮之。或簾簾覆之。如遇輕陰細雨。淡日和風。出架庭中。勿令著地。恐致根長。及引蟲蟻。盆花之法。莫過於此。或云。花果忌麝。當雜種葱蒜。若既爲所觸。急於上風燒硫黃氣以解之。

七曰催養

須於冬日。將樹掘起洗淨。勿傷根芽。當量樹之老嫩。於日中曬數日。乾極。則灑水。後用肥泥拌宿壤種之。若天暖。澆糞數次亦可。但不可曬。一面犯則三面無花矣。又於元旦子時。將斧斑駁擊之。則結子不落。澆

社酒則子繁。又以社日杵百果根則子大。

八曰卻蟲

每於元旦將火徧照植物上。或清明子時將稻草一根縛樹上。或種時將大蒜一枝甘草一寸先放根下。永無諸蟲之患。若有蛙眼以硫黃或芫花塞之。有蟻窠以香油或羊骨引之。有蚓穴以鴨糞或灰水澆之。

九曰貯土

須鋤青草以糞澆之。煨過再澆。如此數次。搗碎篩淨。揀去磚瓦草。收藏缸內。安頓日照雨灑處。或將黃泥浸臘糞中年餘取出曬乾用之。復將炭屑及瓦片浸糞窖中。以爲鋪盆用。

十曰澆灌

澆灌必分早晚。早宜肥水澆根。其法鋤嫩青草。拌陰溝泥。同罨缸內。久則自然流出青水澆。晚宜清水灑葉。其法取天落水或河池水置缸內。投石子數枚。澄過灑之。若晚間驟雨。切勿令見。恐烈日曬後熱氣蒸花故也。或云如欲催花以馬糞浸水澆之。數日後開者。次日即開。